



Ein cyf/Our ref LF/LG/0563/14

Christine Chapman AC
Cadeirydd y Pwyllgor Cymunedau,
Cydraddoldeb a Llywodraeth Leol

9 Gorffennaf 2014

Annwyl Christine

Bil Trais ar sail Rhywedd, Cam-drin Domestig, a Thrais Rhywiol (Cymru)

Cyflwynwyd Bil Trais ar sail Rhywedd, Cam-drin Domestig, a Thrais Rhywiol (Cymru) gerbron Cynulliad Cenedlaethol Cymru ar 30 Mehefin 2014. Ynghlwm ceir copïau o'r tair dogfen ganllawiau drafft a'r pedwar Datganiad o Fwriad y Polisi.

Darperir y dogfennau hyn i roi cymorth i'r Pwyllgor wrth iddo graffu ar y Bil.

Mae'r tair dogfen ganllawiau drafft wedi'u llunio er mwyn rhoi enghreifftiau i'r Pwyllgor o'r materion y gellid mynd i'r afael â nhw yn sgil y canllawiau statudol yr wyf yn ystyried eu cyhoeddi o dan y pŵer a roddir yn adran 12 o'r Bil. Mae'r rhain yn cynnwys canllawiau ar y canlynol:

Fframwaith Hyfforddi Cenedlaethol;
Gofyn a Gweithredu; a
Fforymau amlasiantaeth proffesiynol.

Ymgynghorwyd ag ychydig o randdeiliaid eisoes ar elfennau o'r canllawiau. Fodd bynnag, ar hyn o bryd mae'r canllawiau yn y camau drafft cychwynnol ac, yn unol ag adran 13 o'r Bil, bydd unrhyw ganllawiau a gyhoeddir o dan adran 12 yn ddarostyngedig i ymgynghoriad cyhoeddus cyn i'r fersiwn derfynol gael ei gosod gerbron y Cynulliad er mwyn iddo graffu arnynt. Ni fydd unrhyw ganllawiau o dan adran 12 yn cael eu cyhoeddi nes yr adeg honno.

Ynghlwm wrth bob dogfen ceir ffurflen eglurhaol sy'n rhoi crynodeb o effaith pob un o'r canllawiau hyn. Gellir gweld copi hefyd yn y Memorandwm Esboniadol a gyhoeddwyd ar y cyd â'r Bil Trais ar sail Rhywedd, Cam-drin Domestig a Thrais Rhywiol (Cymru).

Mae Datganiad o Fwriad y Polisi yn rhoi mwy o wybodaeth am fwriad y polisi o ran yr is-ddeddfwriaeth a'r cyfarwyddydau y gellid eu gwneud o dan y Bil, os caiff ei basio.

Edrychaf ymlaen at roi tystiolaeth i'r Pwyllgor maes o law.



Lesley Griffiths AC / AM

Y Gweinidog Llywodraeth Leol a Busnes

Minister for Local Government and Government Business



Llywodraeth Cymru
Welsh Government

Bil Trais ar sail Rhywedd, Cam-drin Domestig a Thrais Rhywiol (Cymru)

Bwriad polisi mewn cysylltiad â
rheoliadau ac is-deddfwriaeth
arall sydd i'w gwneud o dan y Bil

Gorffennaf 2014

Cynnwys

Cyflwyniad	2
-------------------	---

Datganiadau o Fwriad y Polisi

- Cyfarwyddydau o dan adran 5 (adolygiad o strategaethau lleol)	3
- Rheoliadau o dan adran 6 (mewn perthynas â'r wybodaeth ychwanegol y mae'n rhaid ei hystyried wrth baratoi strategaethau lleol)	5
- Cyfarwyddydau o dan adran 16 (i sicrhau cydymffurfiaeth â'r canllawiau a gyhoeddir o dan adran 12)	7
- Gorchymyn o dan adran 22 (pennu dyddiad i'r darpariaethau ddod i rym)	9

Cyflwyniad

Mae'r ddogfen hon yn trafod y bwriad polisi presennol ar gyfer is-ddeddfwriaeth a chyfarwyddydau y gall Gweinidogion Cymru ddewis eu gwneud gan ddefnyddio'r pwerau a geir ym Mil Trais ar sail Rhywedd, Cam-drin Domestig a Thrais Rhywiol (Cymru) ('y Bil') os caiff ei ddeddfu.

Cyflwynir y datganiadau yn y drefn y mae'r darpariaethau perthnasol yn ymddangos yn y Bil, ac mae cyfeiriadau at adrannau ym mhob adran hefyd yn cyd-fynd â rhifau'r adrannau yn y Bil, yn y drefn y cânt eu cyflwyno.

Mae'r Bil yn cynnwys 5 darpariaeth sy'n rhoi pŵer i Weinidogion Cymru greu cyfarwyddydau, rheoliadau, gorchmynion a chanllawiau. Fodd bynnag, ni chyfeirir at ddarparu canllawiau yn y ddogfen hon gan fod canllawiau drafft wedi'u creu eisoes sy'n nodi bwriad polisi Gweinidogion Cymru.

Mae'r ddogfen hon yn amlinellu gweithdrefn y Cynulliad hefyd, os oes un, sy'n gysylltiedig â phob darpariaeth.

Dylid darllen y datganiad hwn ochr yn ochr â'r Bil a'r Memorandwm Esboniadol fel y'i cyhoeddwyd wrth ei gyflwyno.

Mae'r tablau ar y dudalen nesaf yn nodi'r bwriadau polisi ar gyfer pob un o'r darpariaethau hyn yn y Bil.

CYFARWYDDYDAU YN YMWNEUD AG:	Adolygu strategaethau lleol
ADRAN:	5(3)(b)
DISGRIFIAD O'R PŴER:	
<p>Mae adran 5 yn gosod dyletswyddau ar Awdurdodau Lleol a Byrddau Iechyd Lleol ynglŷn â phryd mae'n rhaid iddynt gyhoeddi ac adolygu eu strategaethau lleol.</p> <p>Mae adran 5(3)(b) yn rhoi pŵer i Weinidogion Cymru gyfarwyddo Awdurdodau Lleol a Byrddau Iechyd Lleol i adolygu eu strategaeth.</p> <p>Nid yw'r pŵer hwn yn amodol ar unrhyw weithdrefn o eiddo'r Cynulliad.</p>	
PAM MAE ANGEN Y PŴER:	
<p>Mae adran 5(3)(b) yn rhoi'r hyblygrwydd i Weinidogion Cymru gyfarwyddo Awdurdodau Lleol a Byrddau Iechyd Lleol i adolygu eu strategaeth os bydd amgylchiadau'n awgrymu y dylid cynnal adolygiad, er enghraifft os bydd Gweinidogion Cymru'n penderfynu adolygu'r Strategaeth Genedlaethol.</p> <p>Gan ei fod yn ymwneud ag adolygu strategaethau lleol, gallai'r amgylchiadau lle byddai'r cyfarwyddyd yn cael ei ddefnyddio newid o bryd i'w gilydd. Nid yw'r pŵer cyfarwyddo yn y Bil hwn yn amodol ar unrhyw weithdrefn o eiddo'r Cynulliad cyn y gellir ei weithredu. Mae hyn er mwyn sicrhau bod gan Weinidogion Cymru'r hyblygrwydd i ymateb yn gyflym i newidiadau mewn amgylchiadau, gan sicrhau bod strategaethau'n cael eu hadolygu ar lefel lleol mewn modd amserol. Er enghraifft, gallai amgylchiadau lleol olygu y dylid adolygu strategaeth ardal benodol.</p>	
BWRIAD POLISI'R PŴER:	
<p>Bwriad polisi'r pŵer cyfarwyddo yw caniatáu i Weinidogion Cymru, pan fo newid neu ddigwyddiad sylweddol wedi digwydd ac nid oes disgwyl i strategaethau lleol gael eu hadolygu yn y dyfodol agos, i gyfarwyddo Awdurdodau Lleol a Byrddau Iechyd Lleol i adolygu eu strategaethau ynglŷn â thrais ar sail rhywedd, cam-drin domestig a thrais rhywiol.</p> <p>Er enghraifft, gellid defnyddio'r pŵer hwn pe bai Gweinidogion Cymru'n penderfynu bod angen adolygu'r Strategaeth Genedlaethol, yn dilyn Etholiad Cynulliad o bosibl, ac y penderfynir hefyd y dylid adolygu strategaethau lleol er mwyn cymryd y newidiadau i'r Strategaeth Genedlaethol i ystyriaeth. Gellid ei ddefnyddio hefyd pan fo problem arwyddocaol wedi dod i'r fei mewn ardal benodol ac y gallai adolygu'r strategaeth helpu wrth fynd i'r afael â mater penodol.</p> <p>Ystyrir ar hyn o bryd ei bod yn debygol na fydd y cyfarwyddyd hwn yn cael ei weithredu'n aml, gan fod dyletswydd eisoes ar Awdurdodau Lleol a Byrddau Iechyd Lleol i adolygu eu strategaethau yn dilyn pob etholiad cyffredin o dan adran 5(2). Mae ganddynt yr hyblygrwydd hefyd i adolygu eu strategaethau eu hunain unrhyw bryd yr ystyrir bod hynny'n briodol. Fodd bynnag, mae'n dal i fod yn bwysig i'r pŵer hwn fod yn ei le rhag ofn y bydd ei angen.</p>	

YSTYRIAETHAU ERAILL:
Amherthnasol
RHYNGDDIBYNIAETHAU A CHYSYLLTIADAU Â PHWERAU/RHEOLIADAU ERAILL:
Amherthnasol

RHEOLIADAU SY'N YMWNEUD Â:	Y pŵer i bennu materion ychwanegol y mae'n rhaid eu hystyried wrth baratoi strategaethau lleol ac i'w gwneud yn ofynnol i awdurdod lleol neu Fwrdd Iechyd Lleol gynnal asesiadau pellach.
ADRAN:	6(2)
DISGRIFIAD O'R PŴER:	
<p>Mae adran 6 yn amlinellu nifer o faterion y mae'n rhaid i Awdurdodau Lleol a Byrddau Iechyd Lleol eu hystyried wrth baratoi neu adolygu eu strategaeth leol, gan gynnwys asesiadau o anghenion sydd eu hangen o dan adran 14 o Ddeddf Gwasanaethau Cymdeithasol a Llesiant (Cymru) 2014 ac asesiadau strategol a baratoir yn unol â'r rheoliadau a wnaed o dan adran 6 o Ddeddf Trosedd ac Anhrefn 1998 sy'n ymwneud â throedd ac anhrefn, camddefnyddio sylweddau ac aildroseddu.</p> <p>Mae adran 6(2) yn rhoi hyblygrwydd i Weinidogion Cymru bennu materion ychwanegol a chynnal asesiadau pellach sy'n gorfod cael eu cymryd i ystyriaeth wrth baratoi strategaethau lleol.</p>	
PAM MAE ANGEN Y PŴER RHEOLEIDDIO:	
<p>Mae adran 6(2) yn caniatáu i Weinidogion Cymru bennu materion ychwanegol neu bennu bod asesiadau pellach yn cael eu cynnal gan Awdurdod Lleol a Bwrdd Iechyd Lleol os ydynt yn ystyried bod angen gwneud hyn er mwyn sicrhau bod pob mater sy'n ymwneud â thrais ar sail rhywedd, cam-drin domestig a thrais rhywiol wedi ei ystyried. Yna rhaid iddynt ystyried unrhyw wybodaeth bellach wrth baratoi eu strategaeth leol.</p> <p>Cynigir bod y rheoliadau hyn yn amodol ar y weithdrefn negyddol gan y byddant yn pennu manylion materion technegol a all newid o bryd i'w gilydd.</p>	
BWRIAD POLISI'R RHEOLIADAU:	
<p>Bwriad polisi'r pŵer rheoleiddio yw y byddai'n cael ei ddefnyddio pe bai Gweinidogion Cymru'n penderfynu, ar ôl i Awdurdodau Lleol a Byrddau Iechyd Lleol ystyried eu hasesiadau o anghenion a'u hasesiadau strategol (a gyflawnir o dan bwerau rheoleiddio Deddf Gwasanaethau Cymdeithasol a Llesiant (Cymru) 2014 a Deddf Trosedd ac Anhrefn 1998), eu bod yn annigonol at ddiben llywio datblygiad strategaethau lleol ar faterion trais ar sail rhywedd, cam-drin domestig a thrais rhywiol yn benodol. Felly byddai Gweinidogion Cymru'n gallu gweithredu'r pŵer rheoleiddio yn isadran (2) er mwyn pennu'r wybodaeth ychwanegol neu'r asesiadau pellach i'w cynnal, os yw'n ymddangos bod y cyfuniad o asesiadau o anghenion yn annigonol.</p> <p>Cyn i'r Rheoliadau hyn ddod i rym cânt eu gosod gerbron y Cynulliad o dan y weithdrefn negyddol.</p>	

YSTYRIAETHAU ERAILL:

Pennir y trefniadau ar gyfer asesiadau o anghenion ac asesiadau strategol gan y ddeddfwriaeth ganlynol:

- Adran 14 o Ddeddf Gwasanaethau Cymdeithasol a Llesiant (Cymru) 2014; a
- Rheoliadau o dan adran 6 o Ddeddf Trosedd ac Anhrefn 1998).

RHYNGDDIBYNNIAETHAU A CHYSYLLTIADAU Â PHWERAU/RHEOLIADAU ERAILL:

Amherthnasol

CYFARWYDDYDAU SY'N YMWNEUD Â:	Dan rai amgylchiadau, cyfarwyddo awdurdodau perthnasol i gydymffurfio â'r canllawiau statudol.
ADRAN:	16(2)
DISGRIFIAD O'R PŴER:	
<p>Mae adran 16 (2) yn rhoi pŵer i Weinidogion Cymru gyfarwyddo awdurdod perthnasol i weithredu mewn unrhyw ffordd y mae Gweinidogion Cymru'n ei hystyried yn briodol at ddiben sicrhau y gweithreda'r awdurdod swyddogaethau, yn unol â'r canllawiau statudol a roddir i'r awdurdod perthnasol.</p> <p>Dim ond mewn perthynas â datganiad polisi y mae awdurdod perthnasol yn ei gyflwyno (o dan adran 15 o'r Bil), y mae Gweinidogion Cymru'n ystyried nad yw polisi amgen yr awdurdod ar gyfer cyflawni swyddogaethau (yn rhannol neu yn eu cyfanrwydd) yn debygol o gyfrannu at gyflawni diben y Bil hwn, y gellir gweithredu'r pŵer.</p> <p>Gall Gweinidogion Cymru gyfarwyddo'r awdurdod perthnasol i gyflawni unrhyw weithred gyda'r nod o sicrhau y gweithreda'r awdurdod y swyddogaethau yn unol â'r canllawiau statudol a roddir i'r awdurdod yn unol â'r Ddeddf hon.</p>	
PAM MAE ANGEN Y PŴER:	
<p>Mae'r pŵer cyfarwyddo hwn yn golygu, pan roddir cyfarwyddyd i awdurdod perthnasol o dan yr adran hon, bod rhaid iddo gydymffurfio â hyn ac mae'n rhoi'r hyblygrwydd i Weinidogion Cymru ymateb yn gyflym er mwyn sicrhau cydymffurfiaeth â'r canllawiau a gyhoeddir o dan adran 12, lle y bo'n briodol.</p>	
BWRIAD POLISI'R PŴER:	
<p>Gan ddefnyddio'r canllawiau drafft a ddarperir ar gyfer craffu fel enghraifft, gellid defnyddio'r pŵer hwn pe bai awdurdod perthnasol yn dewis peidio â dilyn elfen o'r Fframwaith Hyfforddi Cenedlaethol a ddarperir gan Weinidogion Cymru o dan adran 12. Er enghraifft, penderfynodd awdurdod perthnasol na fyddai'n ymgymryd â hyfforddiant lefel 1 gyda'i staff, ac yn hytrach cyhoeddodd ddatganiad polisi yn amlinellu dull amgen. Oni bai bod y dull amgen yn cynnig canlyniadau cyffelyb neu well o safbwynt y cyfraniad at gyflawni dibenion y Bil, gallai Gweinidogion Cymru gyfarwyddo'r awdurdod i ddilyn y canllawiau a sicrhau bod yr holl staff yn cael hyfforddiant lefel 1. Er enghraifft, pe bai'r awdurdod yn gwneud dim mwy na chyhoeddi datganiad polisi yn nodi mai ei ddull yw peidio â hyfforddi staff, ond dibynnu ar ymgyrch gyhoeddusrwydd fewnol, mae hyn yn annhebygol o gyflawni'r amcanion a ddymunir. Os mai ei ddull amgen fyddai cynnal hyfforddiant ar lefel fanylach gyda'r holl staff, yna byddai hynny'n cyflawni mwy na'r hyn sydd yn y canllawiau. Y bwriad felly yw sicrhau cydymffurfiaeth gyda'r canllawiau a gyhoeddir o dan adran 12 oni bai bod dull amgen gwell yn cael ei gynnig.</p>	

YSTYRIAETHAU ERAILL:

Amherthnasol

RHYNGDDIBYNIATHAU A CHYSYLLTIADAU Â PHWERAU/RHEOLIADAU ERAILL:

Adran 12 - Y pŵer i gyflwyno canllawiau statudol

Adran 14 – Dyletswydd i ddilyn y canllawiau statudol

Adran 15 – Datganiadau polisi: gofynion a phwerau ategol

PWERAU SY'N YMWNEUD Â:	Cychwyn
ADRAN:	22(3)
DISGRIFIAD O'R PŴER	
<p>Mae adran 22 yn caniatáu i ddarpariaethau'r Bil gychwyn pe bai'r Bil yn cael ei ddeddfu.</p> <p>Mae adran 22(3) yn nodi y gall Gweinidogion Cymru, drwy orchymyn, bennu dyddiad i adrannau o'r Bil ddod i rym nas nodir fel arall yn adran 22.</p>	
PAM MAE ANGEN Y PŴER :	
<p>Gorchymyn yw hwn i greu pŵer i roi hyblygrwydd i Weinidogion Cymru benderfynu ar ddyddiad dod i rym ar gyfer rhai darpariaethau yn y Bil lle na ellir pennu beth fyddai dyddiad addas ar hyn o bryd.</p> <p>Caiff y gorchymyn hwn ei gyfyngu i gychwyn ac mae'n dechnegol o ran natur, felly ni fydd angen unrhyw weithdrefn o eiddo'r Cynulliad ar gyfer y pŵer hwn.</p>	
BWRIAD POLISI'R PŴER:	
<p>Defnyddir y pŵer cychwyn hwn ar gyfer adrannau 2-10, 19 a 20 o'r Bil. Hyd yma, ni phennwyd pryd fydd y darpariaethau hyn yn dod i rym ar ôl deddfu'r Bil ac felly mae'r ddarpariaeth gychwyn yn caniatáu i Weinidogion Cymru benderfynu pryd fyddant yn dod i rym ar ddyddiad diweddarach, mwy priodol.</p>	
YSTYRIAETHAU ERAILL:	
Amherthnasol	
RHYNGDDIBYNIATHAU A CHYSYLLTIADAU Â PHWERAU/RHEOLIADAU ERAILL:	
<p>Mae'r Gorchymyn hwn yn ymwneud â holl ddarpariaethau'r Bil nas rhestrir yn adrannau 22(1) neu (2).</p>	